

姑停肄習柳思訥與判書黃喜啓曰非是樂為唯以肄習耳不  
須停之 上曰此識理者之言乎雖非樂為當此旱災固非習  
樂之時喜與思訥慙服○上護軍平道全請祈雨於漢江道全  
請曰率日本國僧數人依日本禮於漢江水邊沉舍利擊小鼓  
以禱庶可得雨 從之且曰沉舍利祈禱固已妄矣况舉國祈  
禱而不得又賴一倭豎而得乎今此旱災非臣民之罪也責在  
於我○戊寅停各道進鷹子○賜祭於慶安宮主之殯柳思訥  
啓請賜祭 上曰古有禮文乎思訥對曰禮文則時未考也但  
緣情以啓耳 上召禮曹佐郎周冕問於判書鄭易晉山府院  
君河崙皆曰臣子之沒必真義當賜祭也乃遣使祭之○己卯  
月傍有青赤氣○求言 上曰方茲盛農之時久旱不雨恐有  
人事之失令各司及二品已上時政闕失民生疾苦悉陳無隱  
上以旱甚乃日進一膳禮曹上祈雨條目覽之曰今茲久旱  
祈禱之典非不悉舉尚且不雨奚專事於祈禱宜當盡心恐懼  
修省耳若有可行祈禱之事則禮曹自為之○停侍女朔料○